

sBasler Käsperli-Theater



Fasnacht
2014



grindet 1975

Blaggedde 2014



Dr Hampe – dää vom BVD
sait zem Chef vo dr BVB,
loos Jügge – das isch doch e Saich
son e Idee isch birewaich.

Lueg, dass uns nit kaa passiere
wenn du scho fremd wottsch karrisieren.

Die Fotteli, die schaade nämqli
im Imitsch vo unserem Basler Drämmli.
Denn wottsch no e Woonig und e Kaare,
drbyy kenntisch mit em ÖV faare.
Jetzt mien mr laider Abschid nää
kaasch mr grad dy Schlissel gää.
Schaadebegränzig muess i jetzt betryybe,
ich will denn nit uff dr Streggi blyybe.

Dr Käsperli hebt is nundefaane
allewyyl dr Spiegel aane.



Do hänn e paar Lytt nit vyyl dänggt
und zimmlig fescht in dGille glängt.
Si hänn sicher gmaint – uns gheert dWält
dorum bhalte mir au sSizzigsgäld.
Das stoot uns zue, das isch richtig,
schliesslig sinn mir au sehr wichtig.

Do reagiert dr Carlo Conti
är wirft e Bligg uff syyni Konti.
Scho bald iberfallt ihn s grosse Gruuse,
är kaa die halb Nacht nimm pfuuse,
nimmt denn die Fuffzigtäusig Fränggli
macht im Staat e Wiehnachts-Gschänggli.
Zieht sich zrugg im näggschte Summer
und scho isch er en los dr grossi Kummer.

Dr Käspelerli hebt is nundefane
allewyyl dr Spiegel aane.



Do sait doch unsere Grossi Root
dass es so nimm wytergoht.
Die vyyle Auti in dr Innestadt
syuge fir Velofahrer gar nit glatt.
Drumm beschliesst me kurzerhand
dass me dAuti us dr Stadt verbannt.
Das maag fir Turischte luschtig syy
die vyyle Gwärbler aber luegen yy.
Dr Gross Root duet das nit intressiere,
die wänn ihri Furz-Idee duurestiere.
Wie will me Wirtschaftsstandort blyybe,
wenn me dGschäfter duet vertryybe.
Was dien mir fir Politiker wäale,
wo ihre Kopf numme hänn zem sträale.

Dr Käsperli hebt is nundefaaane
allewyyl dr Spiegel aane.





sBaizestärbe goot immer wytter
das isch langsam wirgglig schytter,
denn sRäuchle nach eme feine Ässe,
isch vrbyy – das muesch vergässe,
drbyy lossts sich vyyl besser schnuure
mit eme Zigaretli zwischedure.
Au dFumoir dien nimm provoziere,
si gänn uff, dien resigniere.
Plezzlig heert me ebbis mungle
ganz Basel däppelet im Dunggle...
Schyynts hänn sich zwei in Basel gfunde
und dien jetzt deert am Rhysprung unde
mit andere zämme e Clübbli grinde,
wo me sich driftt zum ene Cüpli mit Frinde.
Das Ganzi nennt sich ganz banal,
fir hundert Userwäälti Club de Bâle.

Dr Käsperli hebt is nundefaane
allewyyl dr Spiegel aane.



Laufsch am Rhyywägg undedure
bisch vom seggle e bizz uff dr Schnuure.
Stoosch ans Gländer und luegsch iber e Rhyy
so scheen kaa unser Basel syy.
Do plezzlig kunnt e unfein Gschmäggli,
luegsch umme, gsesch au grad zwei Schnäggli
wo iber bruuni Hyffeli krieche,
dänggsch das sinn denn armi Sieche
es hett doch deert grad nääbedraa
no e alt verjäästs Stigg Pizza ghaa.
Au Pommesfritt und e Wurscht vom Grill
sinn ibrig vom letschte Basler Chill
und will die Schnäggli no Durscht kennte haa,
brinzlisch ganz schnäll no nääbedraa.

Dr Käsperli hebt is nundefaaane
allewyl dr Spiegel aane.








Jetzt dien mr dAmis provoziere
und ihri Hochhyyer konkurrenziere.
Dr Wessels sait – ich will hooch uuse
will au e mool in de Wolgge pfuuse.
Dräum wyter Hampe – dien mir dir roote
so hoochi Hyyser kenne nit groote,
sganz Stadtbild duesch so verwandle,
mit dyne Idee dStadt verschandle.
Es längt an deene wo mr hänn,
mir mien nit haa, was anderi wänn.
Dä nei Turm an dr Clarastrooss
isch fir Basel doch vyyl zgross.
Immer scheen beschaide blyybe,
due dir das hinter dOhre schryybe
sunscbt dieen mir di nit länger quäale
und snäggscht Mool sicher nimme wäale.

Dr Käspelerli hebt is nundefane
allewyyl dr Spiegel aane.



Raubiberfäll und libruchserie,
dGauner mache halt kaini Ferie.
Goosch zOobe spoot no heimeszue,
dunggel ischs und still drzue,
denn pass uff und lueg um jeede Egge
ob sich ächt ebber duet verstegge
um dir sPortmonee und sHandy zklaue
und dir villicht no aini z haue.
Dr Baschi Dürr findet das gar nit glatt,
är sorgt fir Rueh und Ornig in dr Stadt.
Drum kaasch jetzt bi dr Polizei,
e Gräätli hoole, wo e Schrei
abloot und die halbi Stadt duet wegge,
numme dGauner duets nit verschregge.

Dr Käsperli hebt is nundefaane
allewyyl dr Spiegel aane.





Fascht hätt's is das Joor wider glänggt,
hätt dr Schiri nit so drnääbe dänggt.
Champions-League isch fir das Joor passee
aber näggschi Saison – ihr wärdets gsee,
do kemme mir wider – als Schwiizer Maischter
und glaube au das Joor nit an Gaischter.
Mit em Schär, em Frei und de baide Dääge,
em Streller, em Sommer, das isch doch e Sääge.
Mr würde Ziri, Luzärn und GC lo stoh
und würde am Schluss uff e Barfi goo.
Das gheert sich so, mir sinn halt die Beschte
numme zBasel kaasch so feschte.
Dr goldig Pokal – dä blybt is erhalte,
drum kenne mr au no dr Muri bhalte
und kennsch sneu Mascottli vom FCB,
nai, nit Joggeli – s'haissst Emine.

Dr Käsperli hebt is nundefaaane
allewyyl dr Spiegel aane.



dStadtbildkommission git is zdängge,
die bestimmt jetzt, wo deerfe Faane hängge.
Si bestimmt au de Baize ihri Stieel und Disch
und luegt, dass nit alles so farbig isch.
Nai, dezänt grau oder beige muess es syy
und wehe – es fallt dir villicht no yy
e Pflanzedreegli aanezstelle,
mei, do duet si dr ebbis verzelle.
Liebi Stadtbildkommission – mir hänn e Bitt,
denn in eurem Konzäpt stimmt ebbis nit
und dass sUmsezze ganz schnäll goot
hilft euch sicher dr Grossi Root.
Drum wird au grad e Bschluss erloo,
dass alli Lyyt, wo in dStadt wänn koo,
am Stadtrand graui Glaider mien fasse
damit au si ins scheen Stadtbild passe.

Dr Käsperli hebt is nundefaane
allewyyl dr Spiegel aane.





Rezäpt fir Faschtewaije

ebbe 16 Stigg

Es bruucht:

400 g Mähl
1 Teeleffel Salz
1 Teeleffel Malzbulver
25 g Heefi
2,5 dl Milch
150g Angge
2 Eigääl
Kimm

Heefi in e bizz lauwarmer Milch uffleese. Duesch sMähl in e Schissle, Salz dryy und drunter mische. Denn machsch in dMitti vom Mähl e glaini Verdiefig, duesch sMalzbulver und die flissig Heefi dryy, mit e bitzli Mähl e Breili mache und zuedeggt ebbe e halb Stund uffgoo loo. Drnoo duesch das Daigli mit em Mähl mische, die lauwarm Milch dryy und alles zämme zum ene glatte Daig knätte. Dr Angge verlaufe und e bizzli abkiehle loo und drnoo sorgfältig under e Daig knätte. Dä Daig loosch e gueti Stund am ene kiehlere Ort uffgoo.

Us däm Daig duesch 16 glaini Laibli forme und no mool e Stund in dKiehli stelle. Die glaine Laibli duesch e bitz flachdrugge und oobe, unde, linggs und rächts mit eme Mässer gleini Lecher iischnyyde. Besser gohts mit eme Faschtewaije-Stämpel. Die Laibli duesch denn sorgfältig uusenanderzieh, so dass es us deene Schnitt 4 Lecher git und die typische Faschtewaije-Form griige. Die Faschtewaije mit Eigääl iiistryyche und Kimm driiberstraije.

Im vorghaizte Oofe bi 200°
20 bis 25 Minute bagge.



www.schneeblooser-waggis.ch

Mir dangge:

Drugg: Krebs AG sid 39 Joor drugge si
 die scheenschte Zeedel
 vo uns.

fir dGstaltig Krebs AG

Inapa Schweiz AG fir das tolle Babbyr.

Grollimund AG fir s scheene Binde.

Susy und Esthy fir die fyne Pointe.

em Larvemacher



de Schnidere Angela und Daniela,
 de Haut-Couture vo Basel.

Druckerei



Krebs AG

Offset Buchdruck Verlag

seit 1734



SCHINEBLOOSER WAGGIS

grindet 1975



zBasel an mym Rhy

The musical score consists of three staves of music in common time (indicated by 'c'). The first staff starts with a treble clef and has lyrics: 'zBa - sel an mym Rhy, jo, deert mech i syy!'. The second staff continues with 'Waiht nit d Luft so lind und lau, und der Himmel isch so blau'. The third staff concludes with 'zBasel, zBasel, zBasel an mym Rhy!'. The music features eighth-note patterns and rests.

zBasel an mym Rhy
jo deert mech i syy
dr Käsperli hebt is nundefaaane
allewyyl dr Spiegel aane
zBasel, zBasel, zBasel an mym Rhy

Fasnacht an mym Rhy
Und mir sinn derby
Joor fir Joor am Waagebau
Zeedel, Goschdyym sinn e Schau
Basler Fasnacht und mir sinn derby.

Wottsch e bsundre Raiz
Gohsch z Oobe in e Baiz
Mir intrigiere queer dur dStadt
E mängge Bebbi findets glatt
Schineblooser, jo das mecht i syy.